

**Kyotomi isumaqatigiisummi piffissap pisussaaffeqarfiusup aappaani (2013 - 2020) pisussaaffiliinermi Namminersorlutik Oqartussat nunatut tunuarsimaarfeqarnissaat pillugu Inatsisartut aalajangiiffigisassaattut siunnersuut.**  
(Ineqarnermut, Pinngortitamut Avatangiisinullu Naalakkersuisoq)

**Saqqummiussissut**

(Ineqarnermut, Pinngortitamut Avatangiisinullu Naalakkersuisoq)

**Siullermeerneqarnera**

Nunarsuarmioqatigiit 1997-imi Kyotomi nunarsuarmi gassinik silaannarmik kissakkiartortitsisartunik killilersuisoqalernissaanut isumaqatigiissusiorniartunik aalajangermata, nunarsuarmi silap pissusaanut mingutsitsinnginnerusumik ineriartortitsinissamut annertuumik alloriartoqarpoq.

Aammalu Kalaallit Nunaat nunanut anguniagaqarusunnerpaanut ilaavoq.

Kyotomi isumaqatigiisummi 2008-miit 2013-imut piffissami pisussaaffeqarfiusumi Kalaallit Nunaat suliffissuaqarnikkut ineriartortitsinitsinnut killeqartumut naleqqiullugu annikillitiserujussuarnissamut imminut pisussaaffilerpoq. Naluneqanngitsut ukiumut innersuussiviusumut 1990-imut naleqqiullugu aniatitsinitsinnik 8%-imik annikillititsinissaq angorusutarput angusinnaasimangilarput. Tamanna pingaartumik aatsitassarsiornermi suliffissuaqarnerup ineriartornerata kingunerisaanik gassit silaannarmik kissakkiartortitsisartut annertusinerinik peqquteqarpoq.

Taamaattumik Kyotomi isumaqatigiisummi piffissap pisussaaffeqarfiusup siulliup ingerlanerani annikillititsinissamut amigartoorneq matuniarlugu Kalaallit Nunaat CO<sub>2</sub>-mut akiitsortassanik 13 millioner koruunerpiaat nalingi atorlugit pisiniartariaqarsimavoq. Taamaalilluta nunat tamalaat akornanni isumaqatigiissuterput naammassisinnaasimavarput, kisiannili periaaseq kissaatigisarput atorsinnaasimangilarput.

Nunarsuarmi silap pissusaanut isumaqatigiissutissap isumaqatigiissutigineqanngitsoornera pissutigalugu Kyotomi isumaqatigiissutip 2013-imiit 2020-mut sivitsorneqarnissaa aalajangiunneqarpoq. Kisiannili EU nunallu ikittunnguit allat kisimik annikillititsinissamut imminnut pisussaaffilerput.

Siornatigut misilittakkavut ilinniarfigalugit, Kyotomi isumaqatigiisummi piffissap pisussaaffeqarfiusup aappaani nunatut tunuarsimaarnissaq pillugu Danmark qinnuigineqassasoq Naalakkersuisut ullumikkut aalajangiiffigisassatut siunnersuummik saqqummiussaqrput. Tassalu Kalaallit Nunaat 2013-imiit 2020-mut nunat tamalaat annikillititsinissamut pisussaaffeqarnerannut ilaatinneqassanngitsoq.

Immaqa inuit pilersitaannik nunarsuup kissakkiartorneranik killiliiniarnermi nunarsuarmioqataasutut akisussaaffippat tunukkipput ilaannit oqaatigineqarsinnaavoq. Taamaattoqanngilarli.

Naalakkersuisut gassinik silaannarmik kissakkiartortitsisartunik killiliiniarlutik sulinertik ingerlateqqissavaat, aammalu 2015-imi silap pissusaanut isumaqatigiissutissamut

ilaasinnaanissarput sulissutigissavarput. Tassalu silap pissusaanut isumaqatigiissummut, naapertuilluartuusinnaasutut inissaqartitsilluartutullu, taamaalillunilu aamma nunat suliffissuaqarnikkut aningaasaqarnikkullu ineriartortitsitsinissamik pisariaqartitsisut peqataaffigisinnaasaannut annertuumik neriuuteqarfigisatsinnut.

Ajoraluartumilli nassuerutigineqartariaqarpoq, Kyotomi isumaqatigiissut maannakkutut iluseqarluni nunatut Kalaallit Nunaattut ittunik ilaatitsivissatut naleqqutinngimmat. Kyotomi isumaqatigiissummi pisussaaffeqarfiusut nunanut annertuumik suliffissuaqarfiusunut pilersitaapput. Maani suliffissuaqarnerput taakkunanit annertutiginnimmat, taama annertutigisumik immitsinnut pisussaaffilernissarput naapertuutinngilaq. Tamanna Silap Pissusaanut Isumaqatigiissummi tunngavissat nammattuusut ilaannut naapertuulluinnarpoq.

Suliffissuaqarnikkut ineriartortitsinissamut – pingaartumik aatsitassanut suliassaqarfimmi – pisariaqartitsinerput tunngavigalugu siunissami ukiuni arlalinni gassinik silaannarmik kissakkiartortitsisartunik aniatitsinitsinnik annikillititsinissarput ajornarluinnartussaavoq.

Kisiannili assersuutigalugu nukissiuutinut pitsanngorsaatinik aaqqiissuteqartarnikkut aammalu teknologiimik suleriaatsinillu pissarsiarineqarsinnaasunik pitsaanerpaanik atuinikkut suliffissuit nutaat aniatitaannik annikillisaanissaq sulissutigisinnaavarput.

Tamatuma saniatigut nukissiuutinut ataavartunut isumalluutivut aningaasaqarnikkut immikkut akilersinnaasut atorneqarsinnaasullu paasineqarnerminni, aatsitassarsiornermi suliffissuaqarnikkut ineriartortitsinermut tapertatut atorneqartarnissaat Naalakkersuisut sulissutiginiarpaat.

Taamaalillunga aalajangiiffigisassatut siunnersuut Inatsisartuni suliarineqartussanngorlugu saqqummiuppara. Neriuppunga pitsaasumik pilersitsiviusumillu oqallilluarumaarluta.